

January
2019



KRISTIAN THALAI



Vol. IX No. 11

Kristian Thalai Pawl Chanchinbu thla tin chhuak

KUMTHAR CHIBAI

• VEK ULE •

PEREK PAKHAT

Upa Dr. C. Lalhrekima

INDIA RAM KHAWPUIA KOHHRAN

LEH THALAITÉ

Pastor R. Lalthapua

KUMTHARAH THINLUNG THAR

Lalzuiliana

THALAITÉ MIN SUATTU

HEROIN (NO. 4)

Dr. Lalhriatpua

KUMTHAR THUCHAH

Rev. R. Lalhmingthanga
Synod Moderator



Sihphir Vengthar Bial - Musical Meet



Damparengpui : Sum vawn dan training



Tuikual North Branch : Rorel Inkhawm thlengtu tur

Kristian Ṭhalai Pawl chanchinbu thla tin chhuak

1970-a chhuah ṭan - Kum 49-naa vawi 1-na - Chhuah tawh zat : 482

Editor :

Robert Lalduhzuala

Joint Editors :

C. Malsawmtluanga
Lalsiammawia Pachuau
Malsawmtluanga
K.Lalchhanhima

Manager:

Lalrinchhana Ralte

A lak man :

Kum khatah - ` 80.00
Copy khat - ` 7.00

*Thu chhuah tūr nei chuan Editor,
Kristian Ṭhalai, Synod Office-ah thawn
tūr a ni a; a la duh chuan KṬP Office-ah a
man pèk lāwk a ngai.*

Office Phone : 8794796008

E-Mail :

kristianthalai1970@gmail.com
centralktp@gmail.com

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10 Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrin
Pathianin a buatsaih lāwk a ni.

Thiltumte

1. Isua Krista rinna leh amah anna kawnga ṭhalaita hruai.
2. Kohhran kut ke ni tura ṭhalaita buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

1. Editorial	2
2. Kum thar thuchah	3
3. Kum tharah thinlung thar	5
4. Bible Study	8
5. India ram khawpuia kohhran leh ṭhalaita	10
6. Hriselna : Dr. Lalhriatpuia	13
7. Perek pakhat : <i>Upa Dr. C. Lalhrekima</i>	15
8. Hruaitute chanchin : <i>T.Upa Lalsiammawia Pachuau</i>	19
9. Report : Awareness 2018 kha!	21
10. Sunna : <i>R. Lalduhawma</i>	23
11. Ngaihnaawm Ngaihawm	25
12. Kantu : Biate Branch	27
13. Hringlang tlang : Dinmun inthleng	29
14. Keimahni : Rorel Inkhawm 2019 programme	30




Kum tharah hian!

Kum hlui a liam a, kum thar Pathian hruainain kan thleng leh ta. Kum thar min hruai thlengtu Pathian chu fakín awm rawh se. Fak hla siamtu chuan, “Kum, thla leh ni an kir lo, thal kah a lo let hek lo,” a tih angin kum hluia kan thiltih zawng zawngte kha hunin liampuiin kum a lo thar ta. Kristian Ṭhalai Pawl member zawng zawngte leh Kristian Ṭhalai chanchinbu chhiartute kan Lalpa Isua Krista hmingin Editorial Board chuan kum thar chibai a buk a che u. He kum tharah hian Pathian malsawmna taksa, rilru leh thlarau lamah in dawn ṭheuh theih nan duhsakna kan hlan bawok a che u.

Tunlai khawvel changkannain thuziak hmanga rawngbawlna a eichhiat mek lai leh thuziak hmanga rawngbawlnain ngaihthah a hlawh mek laiin Kristian Ṭhalai chanchinbu chuan zawí zawiin hma a sawn leh mek a, a lawmawm hle. He hmasawmna hi member inpete leh kan kohhrana rawngbawltu thuziak mite thahnemngaihna zar liau liau a ni. Thuziak tha, ngaihnaawm, tawi, fun kim si, mite rilru leh thlarau lam mamawh phuhru thei leh rinna kawngah ṭhan lenna tura fuihtu ṭha tak kan chhuah zel theih nan KṬP member-te thuziak lamah ṭan la turin kan insawm a ni. Thuziak lama harhna leh Pathian thu lam hawi thu ṭha chhiar tam hi KṬP member-te hian tunlaina atan i hmang thar ang u hmiang. Hei hian Pathian rawng kan bawlna kawngah leh kan ni tin nunah kawng tam takin hmasawmna thlenin rilru hrisel min neihtir ngei a rinawm tlat a ni.

Kristian Ṭhalai member-te kumin chhunga kan hmalakna kawng hrang hrangah, “Ka chungah a thiltih ṭhat zawng zawng awang hian Lalpa chu eng nge ka pek ve thung ang?” tia Lalpa tana inphalin, lawm thu sawia a hnena inhlanin, kum thar thutiam kan neihte hlen tura ṭhahnemngaiin ṭan i la ang u. Kan nun leh rawngbawlna kawng hrang hrang te, kan hmalakna te hi KṬP thupui leh thiltum nena inmawi tak lo ni zel se. “Ka hunte i rawngbawol nan, kum tluanin mi hmantir rawh,” tiin inhlan ang u.

– T.Upa Lalsiammawia Pachuau



Kum 2019 Pathian hruaina avangin kan lo thleng leh ta reng mai. Pathian hnenah lawm thu i sawi theuh ang u. Kan hman ral tak kum 2018 te kha thlir kir leh ta ila, kan thianta leh rawngbawlpui tam takin chatuan ramah, he khawvelah kan hmuh leh tawh loh turin min hawsan tawh a ni.

He kum thar hian ka chungah eng nge a rawn chhuahpui dawn tih sawi thei kan awm loh avangin Pathian rorelna hmaa ding tlak a ruat kan nih theih nan he kum tharah hian Pathian duh zawng eng nge ni tih ngaihtuah chungin ni hman i tum ang u.

*Kan nun min hruaitu
atan Isua a tha ber a,
kawng leh nunna a ni
si a.*

Mi tinin buai em ema hun khawh ralna turin buaipui tur taw kan nei theuh mai a, hun khirh tak chu a lo thleng mek theuh a ni ber e. Nimahsela, hei hi hre reng ang u – mi zawng zawng Pathian rorelna hmaah kan la ding dawn a; khup tinreng hi a hmaah a la thingthei ang a, lei tinreng pawh a la inpuang dawn a ni.

Kan duh emaw duh lo emaw pawh ni se, kan la ding dawn a ni. Chutih hunah chuan kan thil tih ang zela relsakin kan awm ang.

Mihringte hian kan dam chungah hian hunpui pathum kan nei a. Chungte chu:- pian, thih leh hemi inkar kan dam chungah hun

hi a ni. Pian chu mihring nun bul inthanna a ni a; mahse, thu kan nei lo. Vun rawng thuah te, len zawng turah te, mizia turah te thu kan nei lo. Thih chu mihring nun tawpna a ni a, chanchin neih zui tur a awm tawh lo. He hunah hian thu kan nei lo reng reng a ni. Nuamsa taka thih thuah eng mah kan thlang thei lo va,

thlarau khawvela min hlang kaitu a ni mai. Mihring tan wawi khat thih ruat hun lo thleng chu a ni. Kan pian leh thih inkar, kan dam chhung erawh keimahni thuneih vena a ni a, ni tina kan hun hman duh dan azirin kan nung thin. Pathian hian kan duhthlanna hi a dah pawimawh em em a, 'I thuin thiamin i awm ang a, i thu vekin thiam lohvin i awm ang,' tih hi kan pawimawh ve hun a ni a. Chuvangin, kan duhthlanna i hmang fimkhur ang u. Rorelna hmaah kan la ding dawn si a.

Kan hma lam hun hi kan hre lo vek mai a, kum kal taah pawh mi tam tak thlan-mualah kan vui liam tawh a ni. Chung mite chu an hrisel loh em vanga kal ta an ni vek lo va, thihna nena kan inkar chu pen khat chauh a ni tih Pathian thuin a sawi si a. Ni tin mi sing chuang khawvelah

an thi mek a, kan hun a thleng ve mai thei a nia. Heng kal Tate hi – hun an hmang tha lo va, sual rawng an bawla, an taksa tana tha lo tur an tih reng vanga thi ta an ni vek hek lo. Rawngbawltu duhawm tak tak leh ngainatawm tak tak an tam asin.

Khawvel thil, ral leh mai turte hi ngai pawimawh hmasa lovin a ram leh a felna chu i zawng zawk ang u. 'Khawvel mawinate lo vul mah se, ka tan zawng i hlu ber Lal Isu,' i ti ang u. Kan nun min hruaitu atan Isua a tha ber a, kawng leh nunna a ni si a. Motor hi tawngin a kawng zawh tha lo mah se, a khalhtu a fim tlat chuan accident a pumpelh thin angin, kan nun hruaituah Isua i thlang tlat ang u.

Rorelna hmaa la ding tur kan ni tih inhriaiin Isua i thlang ang u.



Kan Synod Moderator thar Rev. R. Lalthmingthanga hi Sialsuk khuaah a piang a, a nupui hi Pi Nubuangi a niin fa 3 an nei a ni. Pro. Pastor-in kum 1987-ah Kanghmun Bial leh kum 1988-89-ah Lengpui Bialahte a lo awm tawh a. Lungsen, Chhingchhip, Venghnuai, Tanhril & Mission Veng Bialahte Pastor hna thawkin a lo awm tawh bawk. Tin, kum 2002-2004 chhung khan Siliguri Mission Field-ah Field Secretary niin, kum 2012-2017 chhung khan Family Guidance & Counselling Centre-ah Director-in a awm tawh bawk a ni.



KUM THARAH THINLUNG THAR

Lalzuiliana, Ramhlun North

Pathianin khawvel hi mawi takin a siam: Tum khat chu zing karah Delhi atangin kan rawn thlawk chho va, van sang taka kan thlawh lai chuan vei lamah, Mount Everest leh a bul vel tlang te chu a lo lang uar mai a, boruak thiang, zing ni eng leh van dumpawl ruih mai hnuaiah chuan en nin theih loh khawpa hmuhnawm hian tlang te chu vurin a khuh a, a lan chung chu kan thlir ta ngawt mai a ni. India mi Sunita Williams, van sanga zin mi (American astronaut) khan khawvel pawn atangin kan khawvel thla hi chi hrang hrangin a la a. Africa khawmualpuiah khua a thim a, eng chi hrang hrang a de chuai tawh tihah America khawmualpui chu ni a la eng ut mai a, tuifinriat dumpawl kuk mai te chu hmuhnawm tak a ni. Planet dang aiin kan khawvel hi chu a lo mawi bik hle a ni. A chhunga kan chen avangin Mizoram mawizia te hi kan ngaihtuah ngai lo mai thei e, tlang sang, thing leh mau mawizia te, thlasik romeiin tlang leh ruam a bawh chia i mai han hmuh te hian siamtu Pathian ropuizia a lo lang thin.

Pu Rokunga'n *Aw lei mawina thinlai tihlimtu* a lo ti hial a, Pathian thil siam mawi han thlir chang chuan thinlunga Pathian fakna nen *Khawvel zawng zawng zaiin a khat e, Hmangaih en lai kan ti* a. Kan khawhar ni a lo thlenin, *Ral tawh mai se, lei ninawm hi; Aw khawvel hi a ral ang, rei lo tea'n a ral ang* tih hla te chu vanram ngai chung sak a awl thin. Pathianin a hmangaihte chenna atana

duh taka a lo duan a nih avang te pawh a ni ang e, lei piah lam ram hi ngaiin thlahlel thin mah ila, khawvelah hian rei tak dam kan duh a, kumhlun lo tur tih inhre chungin khawvel hi kan thlahlel em em vek mai chu a nih hi.

Pathianin kan khawvel a siam dan hi a mawi piah lamah kan tan a tangkai hle mai baw. Kan mamawh zawng zawng hi leilungah a lo inphum vek mai, boruak leh

van thengreng atanga mihringte tana thil tangkai tak chawk luh sawi tur a awm lo, lei chung leh lei hnuaihan hian mihringte mamawh a lo dah vek mai a, kan mamawh tih kan hriat loh leh kan zawn chhuah thiam rih loh te pawh a la inphum teuhin a rinawm.

Pathianin Lei thar leh Van thar a siam dawn : Pathianin mihringte chenna atana a siam chu chuti taka tha leh mawi chu ni mah se, duhtawk lovin, "Lei thar leh van thar ka siam dawn," a ti. Khawvelah tuifinriat te mawi kan ti a, tuifinriat hmu theia in sak leh khualbuk te a hluin a to bik thin nen, he lei tharah hi chuan tuifinriat pawh a awm tawh dawn lo, a laiah nunna tui a luang thung dawn a, a lui tui fimzia lah chu krustal (crystal) ang mai a ni dawn. He lui lo chhuahna hnar chu Pathian leh Beramno Lalthutphah atangin a nih tlat avangin bawlhhlawh chu sawi loh, in chu damna a ni dawn, a kam ve veah chuan nunna thing chi hrang hrang chi sawm leh pahnih a awm ang a, chung thingte chu thla tin an la rah dawn lehzal lehngal, chung thing hnah pawh chu hnam tin tana damna a la ni dawn fo bawk.

Kan damlo thei tawh dawn lo va, kan thi thei tawh dawn bawk hek lo a nih chu.

Tin chu mai a la ni lo, ni eng leh thla eng kan mamawh tawh dawn lo, amah Lal Isua chu eng a ni tawh dawn a ni. A khawpui te hi hmuh hlan a nghahhlehawm asin, a kulh te chu Jaspi lunga siam a ni a, khua chu darthlalang thianghlim ang maia rangkachak thianghlima siam a ni dawn. A lungphum thlengin lung man tam chi tinrenga chei mawi a ni dawn. India ramah hian Taj Mahal kan nei a, sailungvar te chu mawi takin an chei a, pangpar lem mawi tak tak sailungvar senduk leh rawng hrang hranga chei a ni a, mawi kan ti em em.

Nimahsela, Lal Isuan kan tana hmun a han siam nen chuan tehkhin tham a ni lo. Chu mai bakah a thlakhlelhawm ber lai phei chu, chu hmuna chengte chu an inhmangaih tawn vek mai hi a ni. Mi dangte hlawhtlinnaa lo na thin an awm lo va, mi dangte hlimna an induhsak vek tawh zawk a, rilru hmun khat puin Lal Isua fak chu an thupui ber leh an nuam tih ber a ni tawh dawn a ni.

Thinlung thar : Chu lei thar leh van thara cheng tur

chuan thinlung thar neih a ngai ta a ni. Ezekiel a chuan, “Thinlung thar ka pe ang che u a, in chhungah thlarau thar ka dah ang,” (Ezekiel 36:26) a ti.

Thinlung thar nei tur chuan engtin nge kan tih tak ang le? Nangmahah Pathian nena inrem thei lo, thil lian tham deuh atanga te deuh nia i hriat kha a mal te tein zawng chhuak la, “Lalpa, hei hi em ni nang nena kan inmil theih lohna chu?” tiin zawt rawh. Israel faten ropui takin Jeriko an hneh hnuah a aia khaw te, Ai khua an hneh thei ta hauh lo mai a. Chuta an chak theih loh chhan, hluihlawn thil lo kawltu an zawn chhuah dan chu, Josua hnenah a hnam a hnamin an rawn inlan a, chumi zawhah a chi a chiin; tichuan, a chhung-


kua a chhungkuain, chumi zawhah a mi malin; tichuan Akana a ni tih an hmu chhuak ta ang khan nangmahah hluihlawn thil, Pathian duh loh zawng awm nia i hriat kha a lian deuh atangin thliar sin zel la, “Lalpa, hei hi em ni?” tiin zawt zel ang che.

Hei hi Thlarau Thiang-hlim hriattir duh zawng tak zawhna a ni, i thinlunga tihtakzeta i zawt a nih phawt chuan. Pathian nena in inrem theih lohna i hria a, i kalsan veleh, “Thinlung thar ka pe ang che u a, in chhungah thlarau thar ka dah ang,” tih chu a taka changtu i lo ni dawn a ni. He kum thar hi thinlung thar nen bul i ñan ang u.

GOLDEN JUBILEE SAWMNA

Kristian Ṭhalai Pawl, Thenzawl Bial chuan ni 24–27 January, 2019 chhung hian kum 50 tlin champha (Golden Jubilee) Thenzawl Venglai Kohhran Biak Inah kan lawm dawn a. He hun rawn hmang tur hian Thenzawl Bial KṬP member lo ni tawh leh member ni mek zawng zawngte kan sawm a che u.

Kristian Ṭhalai Pawl
Thenzawl Bial



INTHAWINA NUNG PATHIAN LAWM TLAK

(Rom 12:1&2) Rev. V. Khai Rodinga
Serampore

Thuthlung Hlui hunah chuan inthawina hian hmun a lua h thuk hle a. Pathian hnena inthawina atan anmahni aiawhin ran emaw an hlan thin a. Inthawina atan ran an hman dawn chuan an duhtui hle a, silawng lo leh dem kai lo a nih a ngai. Chutiang taka an duhtui chung pawh in *"Bawngpate leh kelte thisen chuan sualte tibo thei rual a ni si lo"* (Heb. 10:4).

Thiam kan chan theih nan, chhandama kan awm theih nan, min hmangaih avangin Lal Isua chu *'rimtui atan Pathian hnena thil hlanah leh inthawina atan kan aiawhin a inpe ta a ni'* (Eph. 5:2). Thuthlung Tharah chuan ran emaw kan thil neih emaw hlan tawh lovin, Lal Isua kan aiawha a inhlan tawh avangin, keimahni zawk hi Pathian lawmtlak inthawinaa inhlan tura zirtir kan ni ta. Pathian lawm tlak, inthawina nunga kan hlan tur Bible-in min hrilh chu kan taksa hi a ni. Kan thih hnu chuan kan taksa hian hlutna a nei tawh lo va, tenawm chan a chang zui mai thin a ni. Kan taksa, kan dam lai ngeia Pathian tana kan hlanna hi inthawina nung chu a ni. Inthawina nung leh thianghlim, A lawm tlak ni tura kan taksa hlan Pathianin min phalsak hi a lawmawm hle. Chuvangin, kan dam lai taksa ngei hi Pathian hnena

inthawina nung, Pathian lawm tlak ni tura kan hlan a ngai. Mahni inhlan si lova, kan thil neih ringawt mai Pathian tana kan hlan chuan inthawina nung a tling thei lo. Chutianga kan thil neih ringawt Pathian hnena hlan thin, mahni inhlan phal si lo kan nih chuan kan rawngbawlna hian rah tha a chhuah mawh hle ang. Inthawina nung lo chu Pathian tan pawm rual a ni si lo.

Taksa, rilru leh thlarau hi sawi hran theih mah se, lak hran theih erawh a ni lo. Paulan, *"In taksa chu inhlanah ka ngen a che u,"* a tih hian *'in pumin inhlanah ka ngen a che u'* a tihna a ni. *"Lalpa i Pathian chu i thilnung zawng zawngin, i thlarau zawng zawngin, i rilru zawng zawngin, i chakna zawng zawngin i hmangaih tur a ni,"* (Mk. 12:30) tih hian a sawifiah tha hle. Chu chuan kan taksa, rilru leh thlarau, kan neih zawng zawng pawh a huam thei

ang. Inthawina nung, thianghlim leh Pathian lawm tlaka kan inhlan dan tur:

1. Khawvel dan anga awm loh : Paulan, *"He khawvel dan ang hian awm suh ula,"* a tih hi khawvel mite nun dan leh khawsak dan ang a awm loh tur tihna a ni mai awm e. 'Khawvel mi,' 'khawvel dan' kan tih hian soal lam sawina a ni tih chu kan hre vek awm e. Chuvangin, 'khawvel mi' nia kan hriatte nun dan leh khawsak dan anga awm thei kan ni lo. Pathian tana inthawina nung, A lawm tlaka kan inhlan dawn a nih chuan khawvel thilte chu kalsana, Pathian duh dana nitina kan nun a ngai a ni. Keimahnia bet tlat, soalna leh thil tha lo chakna te chuan kan nunah hmun a chang tawh tur a ni lo. *"Mahni ta pawh in ni lo va, mana lei in ni tawh asin; chuvangin, in taksaa chuan Pathian chawimawi rawh u"* (1 Kor. 6:19f).

2. Danglam ngam : He khawvela kan awm chung chuan 'khawvel mi' nia kan hriatte nen kan cheng ho reng dawn. Soal pawhin ringtute nasa takin min bei zel dawn. Zu leh ruihhlo ti thin, mipat hmeichhiatna lama tlan thin, eiru leh thil tha lo tih ching 'khawvel mite' lakah hian Pathian tana inthawina nunga kan inhlan chuan kan danglam ngam a ngai. 'Khawvel mite' laka danglam

ngam lo chu Pathian lawm tlak inthawina nungin a inhlan lo tihna a ni ang. Ringtu chu inthawina nunga a inhlan tawh avangin a tawngkam, chezia leh thiltihna zawng zawngah a danglam thin. *'Miten min chhiar a, min thlir reng a; kan awmdan zawng zawng min hai lo'* tih hriain ringtu chu kan danglam ngam tur a ni.

3. Rilru thara awm : Mihring ze dik tak chuan soal lam hi a awn deuh zel mai. Chapo tak, mahni tha inti tak leh mi dang thatna lai hmu thei lo hi kan ni. Mahni hma kan sial a, kan thatna tur leh hlawkna tur a nih chuan mi dangin lo tuar pawh ni se pawh kan ti vak lo. Mahse, Pathian lawm tlak, inthawina nunga mi a inhlan tawh chuan rilru thar a lo pu ta a, a lo danglam thin. *"Tu pawh Kristaa a awm chuan thil siam thar a lo ni a; thil hluite chu a ral ta a; ngai teh u, a lo thar ta"* (2 Kor. 5:17). 'Kan mihring hlui chu a hnenah khen behin a lo awm ta a,' Krista rilru keimahniah a lo lang thin. Chuvangin, Pathian tana inthawina nung, thianghlim leh Pathian lawm tlak kan nih zel theihna turin kan mihring hlui zia hi paih ila, Krista Isua angin inngaihtlawmna rilru, thuhnuairawlhna rilru i pu thar zel zawng ang u. **Amen.**



INDIA RAM KHAWPUIA KOHHRAN LEH KRISTIAN ṬHALAITE

– *Pastor R. Lalthapua*
i/c Mumbai Bial

Mizoram Presbyterian Kohhranin India ram khawpuia kohhran a din hi a lawmawm hle mai. Synod thurel bawhzuiin India ram khawpui panga – Bangalore, Mumbai, Delhi, Kolkata leh Hyderabad-ahte kohhran din a ni ta a. Kohhran lo dingin India ram khawpuia Kristian ṭhalai rual zinga nghawng a neih dan tawi tea han tar lan ve kan tum a ni.

1. Kohhran ngaihhlutna a thlen : India ram khawpuia kohhran lo ding mekah hian member tam ber chu ṭhalaite an ni. Member zaa 70-te hi ṭhalai rual, lehkha zir leh hnathawka awm mekte an ni a, an hun awl neih remchan ang zelin kohhran leh KṬP-a inhmangin, mahni kohhran hmangaihna leh ngaihhlutnaa harhtharna (revival) a thleng mek a ni. Kan kohhran mi kher lo pawh, kohhran a nih avanga ngaihlu leh ‘kohhran nge nge chu’ tia, kohhranah leh ṭhalai pawla inhmangin theihtawp an chhuah mek a ni.

2. Kohhran inzirtirna an ngai pawimawh : Ringtu nun, kohhran kalphung zirna hmun ṭha tak a ni mek. Kohhran inrelbawlna hriat

www.mizoramsynod.org

fiah duhna thu hlaah ṭhalai te aṭanga zawhna a tam sawt hle. General Assembly, Synod, Presbytery leh Bial kalphung te, inkhawmpui kalphung leh kohhran ni pawimawh hman chungchang te zirin, India ram khawpui kohhranhote Presbytery khata kan a wm ve theih dan tur thlengin ngaihtuahna an seng a ni. Serh leh sang thuah Sakramen kan neih mek zahawmna leh Baptisma chungchanga kohhran tih dan, inneih chungchanga Zoram kohhran kalphung leh pem lehkha/testimonial thlengin ngaihtuahna thuk tak an seng mek a ni.

3. Kristian Ṭhalai Pawl (KṬP) a ding : India ram khawpuia kohhranah KṬP branch a lo ding ta, ṭhalaite

kut beng thawm a ring hle mai. Member tam tak hi Zoram lama Bial, branch leh group hruaitu lo ni thin, zaipawl lama lo bei fe tawh, KṚP hnatlang leh programme velin a lo chawi tlei tawhte an ni a. Tin, NPSS lamah te pawh rawngbawl na lo chelh tawh an tam hle. Heng mite hi khawhar lungleng takin an lo awm a, an zirna leh hna ṭul tak kara thawk lakna tur awm lo thin kha, KṚP a'n din takah chuan an lo zuang tho va, lawm avanga mittui nen, nuam tihna leh phurna thar a pe a ni. Central KṚP-ah inziak lutin, CKṚP programme leh budget, ṭawngṭai rual programme, hnatlang, zaipawl nen kan ti chho ve ta. Ṭhalai khawhar leh hmun danga vak bo tur a veng a, ṭhalai khawvel a lo par thar leh ta.

4. Taihmakna : Kohhran lo ding hian zirlaite leh hnathawka awmte hnenah nghawng lian tak a neih chu zirna leh hnathawh kawnga taihmakna hi a ni. Kohhran leh KṚP huang chhungah chuan thil kalphung na takin (A ruh langin) sawi a ni thin. Zirlaiten ṭhahnem an ngaiin, rual elna a nasa sawt hle a ni.

Tin, ṭhalai hnathawh tam tak hi tihtakzeta thawk, chhung khata eizawngtute an ni fur mai. Ṭhalai hnathawh 80% vel hi chu nunphung pangngaia hna thawk, theihtawp chhuah takmeuhte an ni. An hlawh chhuah 60% pawh chhung leh khatte thawna, an thawng bang tlem tea hisap nei taka khawsate an ni. Tam tak chuan Pathian Ram Ip leh faith promise lamah theih tawp an chhuah a, Mizoram lama an chhungte thawh-lawm thawh tur nena 50-50-a thawng te pawh zu awm a! Ṭhalai rual zingah chuan lo vak vel mai mai, lo nung vel mai mai tawh awm loh theih loh a ni a, a fuh lo leh hriat hrehawm laite hi social media lama vawrh darh tak chiam mai te a awm leh thin hi a pawh hle. Heng mite hi mi tlem te zawk an ni.

5. Khawpui kohhran hian Mizoram kohhran a la chawm let dawn : India ram khawpuia kohhran lo ding hi mi tam takin sawiselin, na taka dovin, chirhtheh thin mah se, heng harsatna kara ding ṭhalai rualte hi nakina kohhran ban rinawm an la ni dawn. Zirlai thiam leh fel tak tak – doctor rual, engineer

rual, central service lam leh khawvel huapa hotel ropui leh changkanga thawk te, company lama thawk te, sipai lama thawk mekte tam tak an awm. Mahni hnaa rinawm, khawpui lian (Metro city) a nih takavanga chhungril lama danglam chuang map lo, nghet taka ding tlatte hi nakinah chuan kan ramah an lo la haw dawn. Kohhran leh KṚP bela chhum hmin (tih tawngkam han hawhila)-te hi, Pathian Thlarau puihnain kan ram kohhran hnar kaitu, thlang hauhtu, ban rinawm an la ni dawn. Hei hi ka rilru

luah rengtu a ni ṭhin. Nakinah chuan Zoram kohhran hi India ram khawpui kohhran hian a la chawm let ngei ang.

India ram khawpui kohhran a lo ding hian ṭhalaite mai ni lo, nu leh pa, nun khawhar taka awmte pawh a hnemin, mi tam takin thlamuanna an chan pah mek a ni. Kum 2/3 chauh a la ni chung pawhin a hlawkna tam tak hmuh nghal theihin a awm a. Hun a kal hret ang a, kan ṭhalai rualte lo zuang chhuak hian kohhranah nghawng ropui tak a nei zel dawn a ni.



FAKZAI

Synfo-in CKṚP a sawm angin, Central KṚP leh Synfo ṭang kawp chuan Fakzai Krismas pual TV show programme chu November ni 22, 2018 zan dar 7 khan Ramhlun Kohhran Jubilee Hall-ah hlawhtling takin a buatsaih a. Synfo Hruai Eng channel programme atana buatsaih a nih angin TV lamah te tihchhuah a ni bawk.

He programme-ah hian KṚP member zaithiam hrang hrangte bakah KṚP member ni lo – Mizo Zaipawl leh Vohbik-te pawhin hun an hmang a, Krismas thuchah thusawi tawi te ngaihthlak a ni bawk. He Fakzai programme-ah hian Aizawl khawpui chhung Branch hrang hrang ṭangin musician ruat an ni a. Anni hian zaithiamte zai remin khawpui chhung branch hrang hrangah hla an zir ṭhin a, an chanvo ṭha takin an hlen thei bawk.



Thalai min suattu Heroin (No. 4)

– Dr. Lalhriatpuia,
Psychiatrist, MIMER

Hmana mi hausa fate chauhvin an ruih phaka kan ngaih thin heroin hi kan thenawm Burma vangin mi pangngai ban phakah a awm ta. Mizo nula tlangval tam takin kan thihpui mai bakah natna tha lo kan kai phahna a lo ni a. Kan thenawm lah chu khawvela heroin siam chhuak tam ber an ni bawk si. Hmana Manipur lam atanga khawthlang lam pan thin lah kha, tunah zawng kan ram hrut tlangin a kal ta bawk si, tleirawl fanu/fapa emaw, tu emaw nei tan chuan a va luhaithlak em! Chutah lah proxyvon te ang lo takin a titeah inchiu hnuhma an nei tawh bawk si lo, ruih theih a ruka tih theih a lo ni ta bawk si. A ruka kan thalai suattu a nih takah chuan kan hnam tlem te hian kan ralpui mai ang tih hlauhawm khawpin min chiahpiah ta a ni hi.

Proxyvon hun lai atang tawh in addict-te hi kohhran leh khawtlangin kan buaipui hle a, an pualin camping te leh activity tam tak kan buatsaihsak thin. Amaherawhchu, kum 10 kal taa camping-a kan nawr luhte kha tuna kan khalh falte hi an la ni tho. Kan hlawhtling vak lovin a lang. Heng addict-te tana sum leh pai tam tak kan sen thin ngaituahin kan rawlthar/ tleirawlte tana ruihhlo that lohzia awareness campaign lam kan hlamchhiah lutuk erawh a paw hle a ni. Kan hmalak dan hi kan sem rual a pawimawh dawn hlein a lang. Mipa naupang kan nih lai khan kan u

deuhte, proxyvon vanga buai leh harsatna nasa tak an tuarte ni tin hmu thin kan ni a. Kan rualpui zingah khan, 'Ti ve hram rawh u' pawh min ti se tu man ti duh an awm ka ring lo, a hlauhawmzia kan hre chiang em a ni. Hre chiang lovin kan uten an luhchilh kha a nia, inchhir lo an awm ka ring lo.

No. 4 khawih chhin i tum hmam a khawihate awm dan hi lo hre chiang phawt la, chutah duh i thlang dawn nia.

1. No. 4 hi wavi khat lek inchiu pawn zun a nei, mamawh chhunzawmin a siam thei che.
2. I khawih zin hnu chuan a tira nawmna ang kha pakhat

mah a nei tawh lo vang a, normal nan leh suffer loh nan i tih chhonzawm tho a ngai ang. Damdawi hmanga nuam siam chawp a nih avangin thil dang nuam zawng zawng a da tel bawh ang a, hlimna i feel thei tawh lo vang. Mi dang thiante nena hlim taka an inkawm lain nang erawh chuan an hlimna ang i feel ve pha lo vang. In ghei a nih pawhin rei tak chhung chu nawmna a da dawn tho tho.

3. Chhuah i duh ang a; amaherawhchu, darkar 7 pawh inchiu lova i awm chuan i ruh chuktuah zawng zawng a na ang a, thlanfimin a bual huh phung che ang a, kawthalo leh hnap tla rengin i awm ang a, zan pawh i muhil thei lo vang. Amaherawhchu, heng dinhmun hrehawm tak aia tihrehawm tur che chu ruh chhungril za, hiah theih si loh hi a ni, suffer tam takin tihreh tumin hruihrualten an inhlap thuai thuai thin. Heng hi ni khat lek awh a la ni lo zui, kar khat tal chu a awh dawn. Hei bakah damdawi chakna namenlovin a tibuai ang che.

4. No. 4 ti tam zawk hian insulin syringe chhin sen 2-4 an titlangpui, chhinsen 1 hi cheng 800-1000 man a ni. Tu sum mahin a tlin lo. I tih duh ngai loh – rukruk, inzawrh, damdawi

zawrh ruk a ngai dawn. Addict tam tak hian beng tuai vung vung pahin, 'In lian pui ka lo sa zawk lo a ni,' an ti duh lutuk.

5. I hriseinain a tlakpui nghal dawn. Kal, thin tha lo i nei ang a, i nghei hnuah pawh harsatna a siam reng dawn che.

6. Chhungkaw inrem lohna a hring nghal, mi dang lakah i insit ngawih ngawih bik reng ang. In vengah pawh inthlahrung takin i awm reng tawh dawn. Thluaka thawk a nih avangin rilru lam harsatna a siam hnem dawn che, tih mai duh hial khawpin a sawp dawn che.

7. No. 4 i khawih tan atang khan khawi kawmkara boral thut (OD) thei rengah i insiam nghal.

8. I nghei theih loh a nih pawhin chakna leh ruh zain i dam chhung zawngin a thing zeuh zeuh reng tawh dawn che.

9. Chutah inchiu avangin leh mipat hmeichhiatna a ken telte avangin HIV leh natna dang vei thei reng i ni bawh.

10. A pawh ber chu i thlarau nunin a tuar dawn bawh. Heng hi i awih loh chuan No. 4 ti thin i lo zawt dawn nia. Tichuan, he ruihhlo hi khawih chhin loh tawp tur a nihzia i hre thei ang.

.....



PEREK PAKHAT

– Upa Dr. C. Lalhrekima
Mission Veng

Lal Isua Krista pian hmaa mi fing Esopa'n thawnthu a lo sawi daih tawh khan bul tan ka duh a.

Sihal pakhat hi tuichhunchhuahah a tla a, "Engtin chuan ka chhuak leh dawn chu ni ang maw aw?" tiin rei tak a inngaihtuah a. Nakinah chuan kel tuihal tak hi a lo kal a, sihal chu tui a tam nge tam lo, a tui nge tui lo tih a zuk zawt a. Sihal chuan, "Thiana, lo chhuk rawh khai, he tui hi a tui em em mai a, ka in kham thei lo. A tam khawp si a, han kang rual lah a ni hek lo," a ti a. Chutichuan, kel chu a zuang lut ta thuai a. Tin, sihal chu kel kiah chuan a chuang a, a zuang chhuak ta thauh mai a. Kel hnenah chuan, "I khabe hmul chanve zat tal kha thluak nei la chu, i zuan thlak hma khan a thuk zawng i en tha hmasa tur a nia le," a ti a.

Mizo thalaite tan hian he thu hi ka sawi nawn leh ngat duh, "I khabe hmul chanve zat tal kha thluak nei la chu, i zuan thlak hma hian tui thuk zawng kha hi i en hmasa tur a nia le!"

Mizo thalai zingah hian he kel ang vel hi kan awm ang em aw? Zu lipuia kan zuan luh hma hian zu ngawl vei rapthlakzia leh hrehawmzia ngaihtuah Chiang ila chu, heti zat zat hi kan lut lo tur a nia. Drug lipuia kan zuan luh hma hian a thuk zawng en nachang hria ila chuan, heti zat zat hi drug avangin kan thi lo tur. Sex hman khawloh

pawizia te hi aw! Han ngaihtuah Chiang hmasa ila..

Mahse, kan ngaihtuahna kan hman duh lo va. Zu avanga mi tam tak an thiha, mi tam tak an tah mek lai leh, nupa tam tak an inthena, chhungkaw tam tak lu suna an chiau vawng vawng tawh hnuah pawh hian zu chu kan la in lui ta zel a. "Beer te chu zu a ni hlei nem," tiin mahni leh mahni kan inbum a. Beerah kan duhtawk lo va, a aia sangah kan lut ta zel a nih hi. A chhuah a harsatzia an sawi lawm lawm chung pawhin, "Number 4 hi engtin nge a awm tehreng?" tiin kan inchiu lui a. Number 4 kher kher hi

chu a hmuchhuaktu ten 'wonder drug - na chhawkna tha lutuk' tia an hmuhchhuah ni mah se, a ngawl vei a awl avang leh wawi khat tih chhin a pawl avangin khawvelin a khap ta a nih kha.

"Wawi khat zu in ve te chu a pawl em ni? Wawi khat inchiu te chu a pawl em ni? Wawi khet han ruih ve te chu a pawl em ni?" tia a chhanna kan hriat sa tho chu kan inzawt lui tlat a. Ruihtheih thil chi hrang hrang chung-changah wawi khat tih chhin a pawl leh pawl loh sawl thiam har ka ti a; amaherawhchu, wawi khat mah in chhin ngai miah lo chuan zu ngawl a vei dawn lo va, wawi khat mah inchiu chhin lo chuan drug ngawl a vei dawn lo tih erawh chu Chiang takin ka sawl duh.

Engati nge maw Mizo thalaite hian heti em ema ruih hi kan duh em em mai le tih hi ka ngaihtuah thin! Hmeichhe thi nei tur na chhawk nana hman taw, a rui duhten anmahni leh anmahni inbuma 'chhul chakna' an tih ve ringawt te chu kan tlangvalte pawl hian

zuk bar teuh duh a maw le! Khawiah tak chuan thawk dawn maw?

Number four an tih mai, heroin ngawl veite hi kan tam khawp mai. Zir mite chuan heti hian an ti: 'Thalai thatchhia, nuam leh nuam lo hre hrang ve riau si, nawm nghal chak ut ut, dawh-theihna tlachham, hrehawm tuar peih lo, dawihzep, mahni nawmna chauh ngaihtuah, thawk lova hlim tum ve ringawt mai'-te hi heroin addict thinte (heroin addictive behavior) an ni e an tih chu maw le! Chutiang chu em ni Mizo thalaite hi ni ngai? Thian chhan thih ngam, mi dang tan hnawksak hlau, mi dang tanpui tura inpeih reng, hnam huaisen leh tuarchhel, tlawmngaihna nun maw tak nei hnam kan ni zawk lawm ni kha?

Zu leh ruih theih dang khapin a ram buaiin kan buai a; mahse, a rem chuang lo. Politics inchiurtheh nan te kan hmang thul. Zu zawrh leh zawrh lohte chu sawrkarna siam leh siam loh 'deciding factor' emaw kan politician-ten an ti tlat te pawl hi a manganthlak in ka hria. Zu leh

ruih theih thil hi a rem dan kawng khat chauh a awm! Nang leh kei hian zu kan in duh loh chuan zu hi a awm lo mai ang. Nang leh kei hian ruih theih thil kan tih loh chauhvin drugs hi a rem ang. Rui duh kan awm chhung chuan kan ramah hian ruih tur a awm reng dawn.

Khap rem theih hauh loh tur chu sex hi a ni. A hmanrua lah chu kan pai far hlawm mai bawksi a. A hman nachang te hi kan han hre khawp a! Pathianin dik tak leh tangkai taka hman tura a siam anga hman hi chuan hlimna a ni ngei a; mahse, kan hman khawloh nasat avanga kan buaina hi a rapthlak ta hle mai si! Kan ramah sex avanga HIV kai an pun chak em avangin he lam buaipuitute an mang a ang a. Zahthlak pawh sawi thei lovin, khawvel thiamna hmanga min chhanchhuah tumin kan ram, Kristian ram tia kan chhal mek kawng dung tluanah hian, "HIV inkaichhawanna tam ber chu sex a ni. Condom hmang thin ang che," tih an tar ta chiai chuai mai a nih hi! Hawina lam apianga condom hmang tura inzirtir kan ngai ta hi tu

thiam loh nge? Dem tur dang an awm lo ve! Keimahni thiam loh ngei hi a ni.

Kan ram dam nan leh a thawktute kan tanpui nan zanina Zoram tluana lo thlirtu leh KTP branch hrang hrangte hnenah ngenna ka siam duh. Kan poster te hi i thlak teh ang u. **"HIV inkaichhawanna tam ber chu sex hi a ni. I nupui pasal lo chu sex hmanpui suh,"** tih hi mahni branch sum sengin, sawrkar sum tihek miah lovin, fellowship- a kan ei leh in aiah kan sum 'save' ila, branch tinin poster 100 theuh tal siam vek ila, 'sex hman dan dik fakna poster' hmangin condom fakna khawpui hi, condom fakna ram hi kawppuite laka rinawmna khawpuiah kan siam ang chu maw le! Chu chu Lalpa malsawm kan dawanna tur a ni.

Hmanniah khan hnam hnatlang ropui tak kan nei. Mizo mipui kan tan rual chuan thil kan lo tithei khawp mai. Duh thuhmun neia kan han hnatlan meuh chuan vawikhat pen pawh ngai loin vaipa chu a haw lawng lawng mai a nih kha! Kha hnatlang

kha hlawhtling hle mah ila, kan ram hian hmelma dang lak atanga chhan a la mamawh e. Zu leh drugs leh sex hman khawloh lak atanga fihlim tura intiamna **Hnam chhan hnatlang** i nei leh teh ang u. Hnam dang chim ral pawh ngai loa ruitheih thil leh natna tha lo avanga kan ram leh hnam hi a boral loh nan Lalpa hnenah i kir ang u.

Naupang hla pakhat kan zir thin a. *For want of a nail* tih kha. Perek pakhat chungchang. *Sakawr ke kilhna perek pakhat a bo avanginsakawr kephah thir (Horse shoe) pakhat chu a tla bo a, a ke thir pakhat a bo avangin indona sakawr chu a tlu ta a, indona sakawr a tluk avangin a chung a chuang indo mi chu thahin a awm a, indo mi pakhat a thih avangin indonaah an chak ta lo a, indonaa an chak loh avangin lal ram chu hnehin a awm ta* tih kha. Perek pakhat a bo avangin lal ram chu hnehin a awm a nih chu!

Mizoram tan hian Mizo pakhat theuh hi kan tangkai lutuk vek! Kei leh nang hi zu leh drugs leh HIV/AIDS avanga ka kulcho chuan kan chhungkuain a tuar ang

a, kan chhungkua theuh kan tlakchhiat chuan kan khawtlangin a tuar ang a, kan khawtlang a chhiat chuan kan ram hi hnehin a awm dawn asin! Kan ram leh hnam damna hi politician emaw, kohhran hruaitu emaw, sawrkar hnathawk emawte kutah a awm lo a, kan zavaia mawhphurhna a ni e. Kan tih tur theuh tiin ram leh hnam kilh nghettu perek pakhat a i tang ve tlat ang u.

Kan ram leh hnam dam nan, heng thil pathum, zu, drugs leh sex hman khawloh kan hneh dan tur hi 'strategy' pakhat chauh a awm. Thil dang a awm lo, kawng khat chauh a awm. Chu chu 'Lalpa tih' a ni. Mi tinin Lalpa tih ila, a duh zawng ti ila, sual i hua ang u, Tichuan kan hnam hi kan dam ang a, Lalpa malsawm ram rim kan nam leh thei ang.

He thu hi

CKTP Awareness 2018 Programme a Upa Dr. C. Lalhrekima thusawi a ni a, KTP Rorel Inkhawm 2019-ah Awareness 2018 Full Video hi branch zawng zawng tan sem a ni ang.

HRUAITUTE CHANCHIN

Tual Upa Lalsiammawia Pachuau

CKTP Committee Member



Tual Upa Lalsiammawia Pachuau hi Upa chhuanmawia leh Pi Chawngpari te fa upa ber dawttu niin September ni 22, 1979 khan Bethlehem Vengthlang, Aizawl-ah a lo piang a, pianpui unau mipa pahnih leh hmeichhia pathum a nei. Tunah hian Bethlehem Vengthlang ah chengin Bethlehem Venglai Kohhran-ah a lawi mek. July ni 2, 2004 khan Lalrintluangi nen inneiin fanu panga an nei.

Zirna hi Govt. Bethlehem Vengthlang Primary School-I ah bul ñanin, Middle School hi Govt. Bethlehem Vengthlang Middle School-I ah a zo va, High School hi JL High School ah a zo leh a ni. St. Peters Higher Secondary School-ah Class XI zovin, Synod Higher Secondary School añangin Class XII a zo thung. Pachhunga University College atangin B.Sc (Botany) a zo leh baw. A graduate hnu hian High School hrang hrangah te thawk kualin tunah erawh Sumdawna lamah a kal ta thung a ni.

Pu Masiama hi naupan lai añanga Kohhran bel tlat mi a ni a, Sunday School kum 10 a

zawna kaikim lawmman Pi Zaii Medal pawh a dawng baw. Pathian khawngaihna zarah kum 1997 atanga wawiin thlengin chawl lovin Sunday School zirtirtu rawngbawl hna a la chelh tuang zel a ni.

KTP rawngbawl na lamah chuan mite ang bawkin group lamah bul ñanin, kum 2001 añangin Branch Committee ah awmin kum 2010 añangin OB post hrang hrang a chelhkim ve tawh baw. Bethlehem Venglai bial a din hma Bethlehem Bial KTP ah Leader, Secretary leh Asst. Secretary chanvo te a lo chelh tawh a, Bethlehem Venglai bial a lo pianin Leader, Asst. Leader,

tawh bawk. Tin, kum 2013 khan Aizawl East Presbytery KṚP meet ah Secretary chanvo a chelh a ni. Kumin 2018 KṚP General Conference West Phaileng a neihah khan CKṚP committee member atana thlan a ni.

May ni 28, 2017 khan Bethlehem venglai Tual Upa atana thlan tlin a ni a, tunah hian Pathianni zan thuhrlitu, Bial KṚP Asst. Leader, Bial Sunday School Committee member, Kohhran Music Committee Secretary, Senior dept. Leader a ni mek.

Infiamna lamah hian thiam bik em em a nei lo nain rawlthar a nih lai aṅanga a lo khelh ve ṭhin volleyball-ah an veng aiawh te pawhin a khel ve zak zak tawh ṭhin a, tunah erawh Football khel TV lam aṅanga lo en hi a tuipui ber a ni ta.

Thuziak rawngbawlina lamah pawh an branch chanchinbu enkawlin a lo phe ve zak zak tawh ṭhin a, editor chanvo hial te pawh a lo chelh tawh a ni. Zai ngaina mi tak niin Venghlui Bial Zaipawl member te pawh a lo ni ve tawh a, Kohhran Zaipawl Conductor te ni ṭhin in,

Kohhran leh KṚP lamah zaihruaitu chanvo a chelh mek bawk a ni. Pathian fakna hlaah duh tam tak leh a nun khawihtu tam tak zingah *KHB No. 389 'Kal la, i hun zawngin thawk la'* tih hi a nun hnehtu leh rawngbawl zel tura a nun kaihruaitu leh fuihtu a ni. *Pathian thu lamah chuan Exodus 36:7 -'An neihsa chu siam ṭul apiang siamna tur chuan a tawk hle mai a, a tam lutuk mah a ni'* tih hi Pathian in a hruaichhuahna thu a ni a, a ngaina hle bawk.

Tunlai khawvel changkannain kan rawngbawlina a eichhiat mek lai leh kawng hrang hrangah miten kan rawngbawlina demna leh sawichhiatna an dap an dap lai hian KṚP memberte hian kan thupui leh thiltumte nena inhmehtaka kan nun leh rawngbawlina kan kalpui a ṭul takzet a. KṚP rawngbawlina hi awhawm tak leh tel chakawm taka a lan chhuah zel theih nan leh member hla zawk ten Pathian an hnaih deuh deuh theih nan Thlarau Thianghlim hruai theiha inpe turin memberte a chah mawlh mawlh a ni.



AWARENESS 2018

KHA!

*C. Malsawmtluanga
Sub-Committee Secretary*

A thusawi hun a hnaih tawh avanga backstage-a an koh luh hnu lawk chuan "Dr. Sanghluna laptop kengtu an hmu zo lo!" an rawn ti chiah mai chu, Ruihhlo leh a kaihhnawih Sub-Committee Chairman Tv. Robert Lalduhzuala chu a zuang tho nghal zawk a. He Awareness 2018 hi Programme co-ordinator Tv. Kima leh a puitu Hruai leh Alawma te ho a uluk taka duan a ni a. *'Hun a khaihhlak thiang lo.'* tih chu thu thuvawn pakhat a ni a. Rimawi hmanrua te pawh herh mil chawp ngai lova, ri nghal thah tura beisei a ni.

Kan khawhar In leh puipun ni khua a, rui chhi chhe tam em em te, natna hrik inkai chhawn har ber pawl HIV hrik, veng tina kan kawlfur mai te hian rilru a tina tak zet a . Chanchintha puang darh tura Pathian bel ruat inti Ram leh Hnam chanchin hi a tha lo em em si a ni. Chuvang chuan Pathian leh kan hnam hmangaihltute rilru a hah a, "Zu

leh ruihhlo that lohzia te, HIV hlauhawm zia te i inhrilh nawn leh ang u' tiin he Awareness 2018 hi buatsaih a ni ta a ni. Thupui pawh, *'Zu leh ruihhlo aain Lal Isua' tih leh 'HIV/AIDS laka i him nan Lal Isua' tih te a ni.*

He hun hi a buatsaihltute rilruah chuan tleirawl leh naupangte pawhin hmuhawn an tih tur, TV a lo thlirtute pawhin an hmehsawn san mai loh tur khawpa mit leh beng fah programme a ni tur a ni a. Active Sound pawhin hlawkna um lovin, Pu Hmingthana hovin an neih that ber ber an rawn thawh chhuah pui a, Sound a fuh bawk a, Andrew-a pawh a zai ting al al mai lawm. LPS, Zonet leh Hruaina engah te live a nih theih nan Synfo ho lah neitu chanchang takin, Pu Ruatsaka hovin an rawn yang em em bawka.

Synod zaipawl bakah Presbyterian Choir Lunglei te khan programme an tiphuisui hle a. 'Hmelthatna leh zaithiamna lo inkawp thei

hi chu NI.Duhsaki leh Ruth CVL-i te hian a vanneihpui ngawt mai' tih hi an zai lai khan rilruah lo awm. Zorina, Arini leh Cindy te mawlh kha, aw danglam thah si a an han in thumrawn (trio) kha chu a pui teh e, ngaihthlak leh ka chak.

Damveng Veng Branch pawh Tv. Amte-a te unau telin Pu Kros-a te ho an rawn thawk chhuak a. Praise On 2018 beat group pakhatna Electric Vengthlang branch an rawn che pui hle, an vocalist NI. Kimkimi, nula zah zum hmel deuh kha stage-ah chuan a hrohrang a na leh hle si. A van duhawm reuh!

Awareness Band mawlh kha! An rimawi han Class zia kha! An zaitu ls-a leh Mawite-i te zai ngaihthlak nan chuan beng pahnih lek hi chu kan dukhawp meuh lo. Ramthar tleirawl rualrawn lam te kha a hmuhnawm e. Tuikual lamin hun rei lo te chhung a zu leh ruihhlo, mipat hmeichhiat hman sual chungchanga Awareness tarlang thei lemchan an rawn entir thei te kha. American Got Talented atan pawh Chawnpui shadow play kha a zahpuiawm miah loh. Projection Dance mawlh kha, a story a thain, zir a va hautak dawn em! Luangmual Branch video khan

thlirtute min bum, hnehna puan kha a va nuam em. Anni zarah hian Stage LED ah background hmuhnawm tak kan neih theih phah. Central KTP leader, Dr. R.L Sanghluna, Dr. Hrekima leh Rev B. Sangthanga te thusawi kha a van tha em. NI C.Z-i testimony erawh hnuk a ti ulh.

Kan sawi hmaih hauh loh tur chu Host Sangzuala rawn khak tawk theih zia leh, a kawppui Ruthi kawr inhmeh zia kha! Tin, Kulikawn branch photo booth kha, Henry Varte an neih vang em ni. Reception & Ushering, Traffic lah Pu Vengsanga hovin an che tha hle. Banner- Armed Veng branch, Security- Aizawl branch, Photographer lam Republic leh Ramthar Bial, Sanitation- Dawrpui leh mikhual thleng tura ruat Venghlu leh Tuikual Branch te pawhin an chanvo an hneh hle. Sound System- Active sound leh Video coverage- Synfo an che tha ngei e. Eitur min hluitu Mission Veng-thlang kha, kan eibak te kawngdung kal te an lo sem a, an chungah mi rethei khawngaihtu kan Lalpa a lawm khawp ang.

Heng programme zawng zawng Branch ten DVD in kan dawng vek dawn a. A nghahhlelh awm hle.



R. Lalduhawma
Ramhlun Vengchhak Branch

A chanchin :

Pu Lalduhawma hi Pu Ramcharan leh Pi Lalzikpuii (L) te fa 4 zinga a upa ber dawttu niin kum 1979 December thla khan a piang a. Naupan têt ata mi harhvâng leh hlim thei tak, thenrual kawm thiam leh fiamthu duh tak mai a ni. Mi inngaitlawm leh tute pawh an zai ngaia kawm thiam thin mi a ni a. Hei vang hian vengchhung leh a hnathawhna lamah te, a rawngbawlna kawngah te midangin an gaina em em vek mai a ni.

Ni 20.7.2017 khan Bethel Vanlalhriati, Lungpho nen inneiin, nupa hlim thei tak leh inkâwmngeih tak mai an ni a. Nupuite bulah pawh Pathian thu sawi peih tak mi a ni. Ni 20.8.2018 khan Synod Hospital, Durtlangah fapa duhawm tak mai Pathianin a pê a. An hlimpuiin mi lawmpui pawh an hlawh hle a ni.

Rawngbawlna lam :

Pu Lalduhawma hi Kohhrana rawngbawlna ngaipawimawh tak thin niin, Junior Department Asst. Leader a ni mek a. Primary Department-ah te,

Intermediate Department-ah te, Sacrament Department-ah te leh Senior Department-ah te zirtirtu niin a awm kual vek tawh a. Tin, Nilai zan Thupui hawngtu a ni mek bawh.

Kum 1999 aţang khan Ramhlun Vengchhak Branch KṚP-ah Branch Committee Member a ni a, kum 2014 aţang khan Ramhlun Pastor Bial KṚP-ah Committee Member a ni bawh. Rawngbawlna ngaipawimawh a theihtawp chhuah thin mi a ni a. Branch KṚP hnuiaia rawngbawlna peng hrang hrangah te pawh chanvo a chelh a, Property & Documentation Sub-

Committee-ah Chairman niin, Refreshment Sub-Committee-ah member a ni baw k a ni. Heng rawngbawl na te hi a thih ni thlengin a chelh a ni.

A nat dan :

Hun engemaw chen aṅang khan Thisen sâng a nei tih hriat chhuah a ni a. Insawiselna neuh neuh te chu nei ve mahse ding chung nâ niin a hnathawh leh rawngbawl na pawh a tibuai lem lo a ni.

October 1, 2018 (Thawhṅanni) zan khan Ramhlun Vengchhak Branch KṽP inkhawmah Branch Week hawngtuah hman a ni a. A tûk, October 2, 2018 (Thawhle hni) ah pawh Ramhlun Sports Complex Field-a KṽP Sports-naah pawh telin, boruak tizangkhai tu ber niin, item hrang hrang lo comment-tu berah a ṅang a, ṅum dang ang bawkin member ten an hlimpui viau a ni.

Chutia field-a hlim taka hun an hman mek lai chuan, chawhnu lam dar 2:15 velah a chauh deuh avangin

a awm hahdam a, a ziaawm mai loh avangin LRM Hospital, Ramhlun Venglai-ah kalpui a ni a. Doctor ten an enfiah hnu chuan, a Lunga thisen lut leh chhuak chu a mumal lo tih hriat a ni a. ICU-ah lakluh anih lai thleng hian ṅha takin midang ala be thei a ni! Thawktuten theih tawp chhuaha an enkawl mek laiin, zan dar 6:15-ah a rawng a bawl ṅhin, Pathian hnenah min kalsan ta a ni.

A thih zan hian Chanmari Branch KṽP in a ruang chungah pangpar mawi tak an rawn dah a. A tuk October 3, 2018 (Nilaini) chhun dar 12:00 khan Pastor Lalbiakvulmawia, Bialtu Pastor-in vuina hun hmangin, CKṽP Leader hovin CKṽP hruaituten a hun hnuhnung an rawn hmanpui a, la thlahlel viau mah ila, he khawvela in hmu leh ngai tawh lo turin kan thlah liam ta a ni.

*H. Lalnunfela,
Secretary*

*Kristian ṽhalai Pawl
Ramhlun Pastor Bial*



Ngaihnaum Ngaihawm



9774196355

Synod Zaipawl rawngbawlina kan han tan a, uniform thar nen kan zin chhuah hmasak ber naah kan keng kim lo nghal pang mai a, Director form hawh thenin bul kan tan kha a ni a. Pathian awmpuina chang zelin kan han pal ve nawk nawk a.

Rawngbawl a kan zin chhuah naah, Pathianni zan kan hla hnuhnung ber kan sak dawn chuan mipui lam hawiin kan hun hman avanga lawmthu te kan sawi ve a. Kan member nula pakhat chu kan hla hmasa atangin Pathian thlarau awmpuina changin ding hlei thei lovin a awm tawh reng a. Chutia lawmthu ka sawi mawlh mawlh lai chuan ka ke chu a rawn vuan thin a, din tuma min rawn vuan-ah ka ngai mai a. Mahse a lo ni awkhawzawng lo, chhuatah chuan a sam ka lo rahbehsak reng avangin min lo sawi chu niin.

Pathian khawngaihna changin Sapram (Welsh) ah rawngbawlina neiin kan zin thei hlauh mai kha a ni a, kan thlen tuk-ah chuan zaipawl member 2leh Pu Zolawma nen kan kalna tur pakhat a kan va kal hmasa a. Kan haw lam chu zunram

thiar te kan duh bawkw avangin Hotel pakhat-ah hian kan lut a, a lo changkang nasa mai chu niin, tichuan kalpui te inthiar lai chuan keimahin ka lo thu ran mai a, wifi hmang tangkaiin Aizawl lam bia-a ka phone a thu ka type mawlh mawlh lai chuan waiter lokal chuan engemawni hi a rawn sawi a, "Assam" a tih chiah chu ka hre fuh hman a.

Kan kalna hmasa lamah kan awmna min zawh thin avangin Mizoram awmna min zawt ni hmiang ka ti mai a, ka thiam ang tawkw chuan kan hrilh tak tak mai a, ka sawi zawh chuan, nui sang hian, "Darjeeling or Assam" an tih chuan ka harh zawk mai, thingpui-ah ka duh zawk min zawt chu niin, ka in sawk sawk a, pawnah thiante nghak in ka chhuak ta vat a. Ka bul tan na in a zir loh vang nge han chet fuh zan lohna sawi tur ka ngah fu mai.

Chutih rual chuan Pathian hnathawh ropui tak tak ka hmuin ka dawng nasa em em thung. Tam tak zingah keimah leh kan chhungkaw chungah thil thleng hi kan tarlang hram teh ang.


Synod Zaipawl programme ngah zia kan hre theuh a, Khawpui chhung mai bakah zin chhuah ngai nen, hla zir a chhuah reng a ngai. Nupui fanau pawh ngaihtuah tak tak hman lovin kan tulpui ve thin, a hminga conductor nih ve phei chuan ina awm chhunah pawh hla zirtur buaipui reng rengin hun ka hmang a ni ber e. Chutiang taka hun hman a

ngaih avang chuan kan inchhung lam chu Pathian kutah hian ka hlan ve tawp mai thin. Mahse Pathian hian a rinawmzia leh amaha rinna nghat te a thlahthlam loh zia ka chungah a lan tir a. Synod Zaipawl a ka tel chhung leh tun thleng pawhin, damlohna avanga damdawiin luh ngai khawp in vawikhatmah kan awm lova, ka rawngbawl na bahlah leh rilru helhkam nei a chhuahsan ngai khawpin harsatna engmah kan chungah a thleng ngai lo. Ka tih chu tlem te nimahse, a hminga kan tih hi Lalpan a hmuhhmaih ngai reng reng lo a ni.

Kristian Thalai hmasawna lawmawm

Kristian Thalai chanchinbu pawhin kum thar kan lo chuangkai ve leh ta, kan chanchinbu copy chhuahzat pawh engemaw lai khan tlakhniam zauh nei mah se member-te leh mi thenkhat-branch leh mi mal thahnemngaite zarah a copy pawh a pung chho leh hret hret a, hmasawna lawmawm tak a ni.

Nikum lama branch leh mi mal thahnemngaiten home hrang hrang tan te, camping centre, Central Jail, damdawi in tan te leh missionary tante an laksak kha thil lawmawm tak a ni a, kumin pawh hian chhunzawm zel thei ila a lawmawm hle ang. Hetiang luang chhuak rawngbawl na hian kan rawngbawlpui hmun danga awm te, member hla kan tih fo ruihtheih thilin a tihbuaite leh natna chi hrang hrang tuarte hnenah Pathian thiltihtheihna, thlamuanna leh siamtharlehna a thlen thei a ni tih hriain uar deuh deuh thei ila a duhawm hle.



KANTU

Biate Branch

Mizorama aṭha zawnga khaw lar leh faina kawnga mite entawn tur hnutchhiah thei khua Biate khua hi Aizawl aṭangin kilometre 180-a awm a ni a, Biate Pastor Bialah hian kohhran 2 awmin, Biate Branch K.Ṭ.P te hi Kohhran pui lama awm niin, Tuichangral North Presbytery huamchhunga mi a ni. Biate Branch K.Ṭ.P hi Kum 1957 April 7 ah din a ni a, kum 1958 aṭangin Sunday School inkhawm banah ṭawngṭai Inkhawm neih ṭan a ni a, nikum 2018 ah khan K.Ṭ.P ṭawngṭai Inkhawm Diamond Jubilee hi ropui taka lawm a ni.

Nikum 2018 khan member Mipa-240, Hmeichhia-147, an vaiin 387 an ni. Group 3-ah Matthaia, Marka leh Luka Group te a inthen a ni. Group Budget-hi Rs 17000/- a ni. Group hrang hrang hmalakna hi Branch tichaktu pawimawh tak a ni. Branch Committee member zat 24 (OB 6, member 18, Kohhran Committee aiawh 2, ex-officio Bialtu Pastor 1) an awm a, Branch Committee hnuaiah hian Sub-Committee hrang hrang 7 kan nei a, chungte chu- Programme, Usher, Banner & Decoration, Sport, Music, Sound & Prop-

erty, Evangelical Cell te an ni.

Heng Sub-committee hrang hrang te hian kan chanvo leh mawhpurhnate tha ṭakin an hlenchhuak ṭhin bawk. Member hlate hnuhhnaih nan Bethel Camping leh member in-a ṭawngṭaina hun te hman ṭhin a ni. Faith promise hi thla thar Pathianni vawi 1-na ah lakkhawm thin a ni a, Committee member ten bial neiin mahni bial-ah lakhawm thin a ni. Kumin 2018 khan Missionary 8 an chawm a, an Branch aṭang hian Missionary a chhuak 4 an nei mek a, Pas-

tor tanglai 2 an nei bawk a ni.

Thawhṭan zan inkhawm hman dan tlangpui- Faith promise night, Sermon/Short sermon, Booklet zir, Evangelical Night (Project 150), Sharing te a hun hman thin a ni a, heng bakah hian Central lam aṭanga thupui zir tur awm te an zir thin bawk. Sumtuak dan tlangpui- Faith promise, Farm sam, Balu lak, Slap chhun, Blanket suk, thiam thil thekhawm, Hnawm paih etc. K.T.P ten Serthlum Farm ṭha tak an nei a, kum tinin Serthlum rah hi man man takin an hralh ṭhin. Hei hi an sum lakluhna hnar pawimawh tak a ni.

Kum 2018 chhunga Branch in Project an nei te-

- 1) Projector
- 2) Light system
- 3) Jersey set
- 4) Bethel Camping
- 5) K.T.P Serthlum Farm thlam sak that te a ni a, heng an project te hi ṭha takin an hlenchhuak thei bawk.

Kum 2018 chung khan Branch-in Chanchinbu

kartin chhuak 'BETHESDA' tih chu Pathianni-ah tihchhuah thin a ni a, copy 373 tihchhuah a ni. Kristian Thalai Chanchinbu hi copy 80 an la bawk.

Kohhran ni pawimawh apiangah Kohhran Zaipawl ten hla an rem thei ziah bawk. An member Biak In hawnga in nei an awmin lawmpuina thuziak leh pawisa hlan ṭhin a ni a, an member boral an awmin puanin an tuam ṭhin a, ralna pawisa an hlan ṭhin bawk.

An Kohhran mi boral an awmin an boral aṭanga Pathianni hmasa berah an in-ah ṭawngṭaina hun an hmang ṭhin. An member ralna thilpek hlan tur an awm chuan hemi hunah hian an hlan ṭhin bawk. Kum tinin Group Sport neih ṭhin a ni a, Sport Item chi hrang hrang Indoor leh Outdoor hmangin Sport neih ṭhin a ni a, lawmman ṭha taksiam ṭhin a ni. Kum 2018 khan Branch in Kumpuan an nei a, 'Inkhawm kal hma' tih hman a ni a, K.T.P mai niloin Kohhran thlengin an hlawkpui hle bawk.



HRINGLANG TLÁNG

DINHMUN INTHLENG

Rickshaw pu chuan, ' Ka pu, a tira i sawi aiin a hla a, Rs 80 tal ni rawh se,' a ti vel tlat a. Khualzinpa nen chuan an thu a inhmu thei lova, an inhnia an inhnia a.

Khawpui lianah chuan mihring te hi an tama, vei vahna mamawhna pawh a sang a. Chuan man tlawm deuh Cycle rickshaw pawh mi tam tak eizawna a ni ve a.

Khua lah chu a lum huam huam a. khualzin pakhat, sa nei zet mai hi Cycle rickshaw ah chuan a thu tum bur a. A khalh-tupa chu a thlan a far zawih zawih a, theih tawp chhuaha thirsakawr rap a ni baw a, a chauh hmel hle a.

Khualzin chuan cheng 50 keng vu hian, " A tirah cheng sawmnga in a thlen theih ang i tia, tunah cheng sawmriat i tih leh! Eng ang mihring rinawm lo nge i nih," a ti tun tun a. Rickshaw-pu chuan, "Ka pu, mi rinawm hnam kan ni. A tira i sawi ai khan he lai hmun hi chu a hla daih zawk. A nih na takah chuan cheng 100 tur a ni a.." a ti ve tlat a, pawisa chu a la duh bik lova.

Rickshaw pu chuan, " A nih leh kapu, ka thutna ah hian rawn thu la. Kei i



thutnaah khan ka rawn thu a nga. Kawtthler hnihna thleng lek sawk min rah sak la. Rs 50 ka pe zawk ang che!" a ti let ve ta a. Khualzinpa chu lungawi lo tih hriat fe hian a hnar a tum dut dut a.

Hringnun hrethiam tur chuan dinhmun inhriat tawn hi a tul hle. Tlar hran atanga ngaihndan siam ai chuan, an khawthlirna tarmit ngei vuah pui a, an dinna pheikhawk kan va bun pui chiah hian, midangte dinhmun hriatthiam a awl thin.

Keimahni



KRISTIAN THALAI PAWL ROREL INKHAWM VAWI 8-NA PROGRAMMES

A hmun : Tuikual North Kohhran Biak In
A hun : March 1 - 3, 2019

MARCH 1, 2019 (ZIRTAWPNI)

6:30-7:00 pm : ZAI HO

7:00 pm : PALAI LAWM & REPORT INKHAWM

Chairman : Upa Rosangliana , Asst. Leader, CKTP.

Kumpuan hawn leh hlanna

Hlantu : Executive Secretary i/c KTP

Reports : 1. General Secretary Report.

2. Finance Secretary Report.

3. Bial Reports khaikhawmna

Zaipawl : 1) Mizoram Synod Choir.

2) Sihphir Vengthar Bial.

3) Tlungvel Vengthar Bial.

4) Maubawk Bial.

MARCH 2, 2019 (INRINNI)

9:30 am-4:00 pm ROREL INKHAWM

Hruaitu : Rev. Dr. K.Lallawmzuala, Leader, CKTP.

6:30-7:00 pm : ZAI HO

7:00 pm PATHIAN BIAK INKHAWM

Chairman :Dr. David C.Vanlalfakawma,
Comt. member, CKTP

Thuhriltu :Rev. R. Lalhmingthanga, *Synod Moderator*

Zaipawl :
1) Mizoram Synod Choir
2) Durtlang Bial
3) Sateek Bial.
4) Presbyterian Choir Lunglei.

8:45 pm FELLOWSHIP

Chairman :Tv. C.Malsawmtluanga,
Comt. member, CKTP

Thusawi tawi : Pu David Lalmachhuana,
Comt. member, CKTP

Items :
1. Musical Drama - Dawrpui Bial
2. Faklâm - Bawngkawn Bial

MARCH 3, 2019 (PATHIANNI)

9:30-10:00 am : ZAI HO

10:00 am : PATHIAN BIAK INKHAWM

Chairman : Dr. Lalrotluanga, Treasurer, CKTP

Thuhriltu : Upa Rosangliana, Asst. Leader, CKTP

Zaipawl :
1) Mizoram Synod Choir.
2) Muallungthu Bial.
3) Tanhril Bial.
4) Tuikual North Kohhran.

1:00-1:30 pm : ZAI HO

1:30 pm PATHIAN BIAK INKHAWM

Chairman : Tv. Robert Lalduhzuala, Comt. member, CKTP

Thuhriltu : Rev. B. Sangthanga, Executive Secretary

Zaipawl : 1) Presbyterian Choir, Lunglei.
2) Himali Bial.
3) Hunthar Bial.
4) Ramhlun Vengthar Bial.

6:30-7:00 pm : ZAIHO

7:00 pm PATHIAN BIAK INKHAWM

Chairman : T.Upa Lalmuanawma, Fin. Secretary, CKTP
Thuhriltu : Rev. Dr. K. Lallawmzuala, Leader, CKTP
Zaipawl : 1) Mizoram Synod Choir.
2) Lungleng-I Bial
3) Sairang Dinthar Bial
4) Zemabawk North Bial

8:45 pm : FELLOWSHIP

Chairman : Upa K. Lalnuntluanga, Comt. member, CKTP
Items : 1. Drama - Chhinga Veng Bial.
2. Female Voice - Zonuam Bial.
3. Shadow Play - Bethlehem Bial.
4. Solo – Nl. Lalremsiami (Nunu-i),
Dâm Veng Branch
5. Praise On 2018 pahnihna

NOTE :

1. *Zai hruai hi a thlengtu kutah dah a ni.*
2. *Pathianni chawhma leh zan inkhawmah thawhlawm lak kharom a ni ang.*
3. *Fellowship hunah hian a tam thei ang ber zaiho a ni ang.*

KTP Rorel Inkhawm 2019 tluang tak leh hlawhtling taka neih a nih theih nan KTP member zawng zawng te i tawngtai ang u.



Kantu :Biate Branch

CENTRAL K.T.P. HRUAITUTE 2018-2020

Office Bearers

Leader	: Rev. Dr. K. Lallawmzuala	9402551279
Asst. Leader	: Upa Rosangliana	9612166769
Gen. Secretary	: T.Upa Rochungnunga	9862658082
Asst. Secretary	: Tv. Ricky Lalrammawia Ralte	9862387308
Treasurer	: Dr. Lalrotluanga	9436153937
Finance Secretary	: T.Upa Lalmuanawma	9436196515

Committee Members

Dr. David C. Vanlalfakawma	9436156561	Tv. Robert Lalduhzuala	9862368012
Tv. C. Malsawmtluanga	9862587200	T.Upa Lalsiammawia Pachuau	9862742440
Pu K. Lalengzama	7308187298	Upa K. Lalnuntluanga	8974240614
Pu David Lalhmachhuana	8415926838	Pu R. Lalbiakmawia	9612762602
Pu Rorelkima	9862266440	Tv. Benjamin Lalnunpuia	9862306526
Pu Lalrinchhana Ralte	9774365619	Pu P.C. Lalrinsanga	9436144233
Pu Malsawmtluanga	9612588677	T.Upa Lalrinmawia Ralte	9862359884
Pu Lalruatfela	9436705777	Tv. K. Lalchhanhima	9089933771

Ex-Officio Members

<i>Rev. F. Lalrinnunga</i>	-	<i>Synod Moderator</i>
<i>Upa R. Dengzikpuia</i>	-	<i>Synod Secretary (Sr.)</i>
<i>Rev. B. Sangthanga</i>	-	<i>Executive Secretary i/c KTP</i>

Postal Regn. no. MZR/81/2018-2020
RNI No. MIZMIZ/2009/29074



Tuikual South Branch Evangelical Night



CKTP Awareness Band Awareness 2018



CKTP committee - AKZAI 'Krismas puál

Printed and Published by Rochungnunga, Synod Office, Mission Veng on behalf of Kristian Thalai Fel.
Edited by Robert Lalduhzuala and printed at Synod Press, Mission Veng, Aizawl, Mizoram. Copies - 4